

Zürich, 25. Mai 2007

Proteger las minoritads è democratic

"La relaziun cun las minoritads è il termometer da fevra da la democrazia" – uschia è s'exprimì Sigi Feigel che prendeva adina posiziun a moda precisa e clera en dumondas che pertutgavan la relaziun cun las minoritads. La Societad minoritads en Svizra, fundada l'onn 1982 sin iniziativa da Sigi Feigel ed Alfred Häsler (l'autur da "Das Boot ist voll"), s'engascha per las minoritads – religiusas, etnicas, linguisticas, etc. – tranter auter era per ils Rumantschs. Ella persequitescha perquai cun interess ed atenziun las discussiuns en connex cun la nova lescha da linguas dal chantun Grischun.

La cumissiun presidenziala è vegnida attenta, legend ch'i saja nundemocratic da proteger la minoritad rumantscha en ses territori tradiziunal. Il cuntrari è il cas: la fermezza da la democrazia svizra ed en spezial da quella grischuna sa mussa en ina protecziun exemplarica da las minoritads.

Las Grischunas ed ils Grischuns da tut las trais cuminanzas linguisticas vegnan a demussar lur responsabladad en la votaziun impurtanta davart ina reglamentaziun legala da la promozion e da l'applicaziun da las linguas minoritaras, sco quai ch'ella exista uschiglio dapertut. Ellas ed els vegnan ad esser conscients che la publicitad svizra – che stima fitg il Grischun cun sias trais linguas e culturas – drizza sia eglia en quests dis spezialmain sin els.

Per motivs objectivs ed emoziunals sustegna la Societad minoritads en Svizra las finamiras che la regenza grischuna ed il Cussegl grond persequiteschan cun la lescha da linguas. Quella munta ina impurtanta contribuziun ad ina Svizra quadrilingua vivida.

Prof. Dr. Dr. h.c. Werner Kramer
president da la Societad minoritads
en Svizra GMS